

## Otvoreno pismo institucijama Evropske unije Mladić mora ostati Tadićev prioritet

Respektabilne javne ličnosti pokrenule peticiju da se Srbiji ne omogući ratifikacija SSP-a dok god je general Ratko Mladić na slobodi

Mi, niže potpisani, izražavamo svoju zabrinutost da bi general Ratko Mladić mogao izbjegniti pravdi. Skoro deceniju i po otkako je optužen pred Međunarodnim krivičnim sudom za bivšu Jugoslaviju, Mladić se nalazi u bjekstvu. Mi podržavamo napore vlade Holandije da hapšenje osobe optužene za genocid u Evropi treba biti uslov za ratifikaciju Sporazuma o stabilizaciji i pridruživanju i ključni korak na putu ka učlanjenju Srbije u Evropsku uniju. Ovo stoji na početku peticije koju su, uoči sastanka evropskih dužnosnika koji bi u ponedjeljak trebali razmotriti da li hapšenje najpoznatijeg evropskog bjegunca od pravde Ratka Mladića i dalje treba biti preduvjet za ratifikaciju Sporazuma o stabilizaciji i pridruživanju Srbije i Evropske unije.

### Ispunjavanje obaveze

"Insistiranje na uslovima dovelo je do izručenja Radovana Karadžića Haagu. Dalje insistiranje će pomoći da se i Ratko Mladić suoči sa pravdom. Kad je objavljivao aplikaciju za članstvo u Evropskoj uniji, predsjednik Boris Tadić je obećao da će Ratko Mladić biti priveden. On je kazao kako je to obaveza Srbije po međunarodnom pravu. Zahtijevamo da svaki korak ka Evropskoj uniji za Srbiju bude uvjetovan ispunjenjem te obaveze", stoji u peticiji koju su potpisale brojne javne ličnosti, između ostalih i Payam Akhava, bivši dužnosnik tužiteljstva Haškog tribunala, Vlado Azinović, generalni sekretar Atlantske inicijative u BiH, Kurt Bassuener, Vijeće za političku demokratizaciju, Sonja Biserko, Helsinški komitet Srbije, Darko Brkan, pokret Dosta!, Richard Goldstone, prvi glavni tužitelj Haškog tribunala, Marko Attila Hoare, profesor Kingston univerziteta u Londonu, Michael Haltzel, Centar za transatlantske odnose iz Washingtona, Ivana Howard, politička analitičarka, Noel Malcolm, profesor historije na Univerzitetu Oxford, Philipp Ruch, Centar za političku ljepotu iz Berlina, pisac Chuck Sudeć, Bodo Weber iz Vijeća za političku demokratizaciju, publicista Emir Suljagić, Bianca Jagger, predsjednica istoimene fondacije za ljudska prava, Jim Hooper, menadžer vašingtonske Javne škole za međunarodno pravo i politiku, Florence Hartmann, novinarka i bivša glasnogovornica glavne tužiteljice Haškog tribunala.

Jučer je, također, grupa nevladinih organizacija iz Srbije (Helsinški komitet za ljudska prava, YUCOM - Vi-



Mladić mora biti izručen Haagu

jeće pravnika za ljudska prava, Fond za otvoreno društvo, Građanska inicijativa, Nezavisna asocijacija novinara Vojvodine, Centar za kulturnu dekontaminaciju, te Žene u crnom) poslala otvoreno pismo u kojem se navodi kako je hapšenje Ratka Mladića moralna obaveza Srbije.

### Pismo Tadiću

"Srebrenica je isprovocirala jedinstvenu osudu u cijelom svijetu. Međunarodni sud pravde u Haagu je presudom utvrdio kako je u Srebrenici počinjen genocid, te utvrdio krivnju Srbije što ga nije spriječila. Međunarodni krivični sud za bivšu Jugoslaviju je također sa nekoliko svojih presuda utvrdio genocid u Srebrenici. Trenutno su u toku suđenja Radovanu Karadžiću, Momčilu Perišiću, Franku Simatoviću i Jovici Stanišiću, kojim se također optužuju za genocid u Srebrenici, ali i drugim dijelovima Bosne", piše u pismu u kojem se dalje podsjeća kako je Evropski parlament usvojio Deklaraciju kojom je 11. juli proglašen Danom sjećanja na Srebrenicu.

"Nedavno je, u skladu s tim, Srbija usvojila Deklaraciju kojom je osuđen zločin u Srebrenici, te tako prihvatila svoju odgovornost. To je važan korak u prihvatanju odgovornosti za zločin, ali bez hapšenja Ratka Mladića nema konačnu svrhu. Stoga tražimo od Vlade Srbije da uhapsi Ratka Mladića bez ikakve odgode i isporuči ga Haškom tribunalu. Svako libljenje bi predstavljalo dalju diskreditaciju Vlade te umanjilo mogućnost da se Srbija svijetu predstavi svjesna svojih poteza, kako u prošlosti, tako i u sadašnjosti", stoji u pismu.

Faruk BORIC

## Ministar sigurnosti Sadik Ahmetović potpisao rješenje

# Suspendovan Vjekoslav Vuković

Vuković je svjestan da je rješenje o suspenziji do okončanja sudskog postupka najbolje i za njega i za Ministarstvo, istakao ministar sigurnosti Sadik Ahmetović

Kako je Oslobođenje i najavilo, ministar sigurnosti BiH i zamjenik predsjedavajućeg Vijeća ministara Sadik Ahmetović jučer je potpisao rješenje o suspenziji Vjekoslava Vukovića, pomoćnika ministra za borbu protiv terorizma, organizovanog kriminala, korupcije, ratnih zločina i zloupotrebe narkotika, do okončanja sudskog postupka. Ministar Ahmetović istakao je za naš list kako je prije donošenja rješenja obavio razgovor sa Vukovićem.

### Pravna i politička dimenzija

- Vuković je svjestan da je rješenje o suspenziji do okončanja sudskog postupka najbolje i za njega i za Ministarstvo. Stoga ne očekujem da će na njega Vuković uložiti žalbu, naglasio je Ahmetović za Oslobođenje.

On je istakao kako je obrazloženje za donošenje rješenja o suspenziji Vukovića doneseno nakon što je pomoćnik ministra nedavno na Županijskom sudu u Rijeci nepravomoćno osuđen na devet mjeseci zatvora zbog optužbi za posredovanje u nabavci oružja.

To oružje je trebalo biti korišteno u atentatu na dva riječka zaštitara u oktobru 2008. Ključni dokaz za osuđujuću presudu Vukoviću je iskaz riječkog zaštitara, inače optuženog i osuđenog



Ahmetović: Ne očekuje Vukovićevu žalbu na rješenje

u ovom predmetu Roberta Dragina. Kao olakšavajuća okolnost uzeta je Vukovićevo besprije-korna profesionalna karijera, a kao otežavajuća visoka funkcija koju obavlja u Ministarstvu sigurnosti BiH. Javnost u Hrvatskoj, ali i BiH ocjenjuje, inače, da ovaj slučaj ima dvije dimenzije - pravni u susjednoj, a politički u našoj zemlji. Smatra se, naime, kako je osuđujuća presuda za Vukovića "legalizirala nelegalno prisluškivanje hrvatskih obavještajnih službi njegovog službenog i privatnog telefona".

### Prisluškivanje

Upravo pitanje prisluškivanja izazvalo je burne reakcije, prvenstveno u BiH, a brojni zvaničnici, među kojima je i izaslanik u Klubu hrvatskog naroda Doma naroda i član zaje-



Vuković: Prvostepeno osuđen na devet mjeseci zatvora

dničke komisije za odbranu i sigurnost Parlamenta BiH Ivo Miro Jović, od Obavještajno-sigurnosne službe BiH tražili su podatke "da li je i pod kojim uvjetima bilo prisluškivanje zvaničnika BiH".

Inače, Vuković je prvi put bio suspendiran u februaru 2009. kada ga je iz državne službe uklonio bivši ministar sigurnosti Tarik Sadović, odnosno odmah nakon potvrđivanja optužnice na Županijskom sudu u Rijeci, ali je odlukom Odbora državne službe za žalbe vraćen na posao.

Novom suspenzijom slučaj Vuković se ne zatvara s obzirom na to kako je njegov odvjetnik odmah nakon izricanja prvostupanjske presude najavio žalbu Vrhovnom sudu Hrvatske.

A. TERZIĆ

## Predsjednica FBiH kandidat za Predsjedništvo BiH

### Borjana Krišto na međan Komšiću

Borjana Krišto, aktualna predsjednica Federacije BiH i dopredsjednica HDZ-a BiH, bit će kandidatkinja HDZ-a BiH za hrvatskoga člana Predsjedništva BiH, potvrđeno je jučer iz ove stranke.

- Ovo je po prvi put da je HDZBiH kandidirao jednu damu na najvišu političku dužnost u BiH, stoji u štucrom priopćenju HDZ-a BiH izdanom nakon jučerašnje sjednice stranačkog Predsjedništva.

Krišto je, pak, za Oslobođenje izjavila kako nije počašćena ovom kandidaturom.

- Ljudi koji bi olako preuzeli ovako nešto na svoja ramena bi pokazali kako ne znaju što je odgovornost. Ja, s druge strane, svaki svoj posao doživljavam vrlo odgovorno pa tako i ovu kandidaturu, izjavila je Krišto, te dodala kako je svjesna kako slijedi naporan razdoblje predizborne kampanje.

Dodala je i kako je svjesna da je prednjom iznimno naporno razdoblje predizborne kampanje.

Inače, od izvora iz HDZ-a BiH doznaje se kako se vodstvo te stranke dvoumilo hoće li



kandidirati Krišto ili Radu Bošnjaka, zastupnika dijaspore u Hrvatskome saboru.

- U stranci su se premišljali između nje i Bošnjaka, no predsjednik HDZ-a BiH Dragan Čović je izabrao nju i svaka daljnja rasprava je postala bespredmetna. Uže vodstvo stranke je smatralo kako je Bošnjak bolja opcija za hrvatskoga člana Predsjedništva, međutim, Krišto je dobila povjerenje i sada nam preostaje nadati se kako će zbilja ona i pobijediti na izborima, rekao je naš izvor iz HDZ-a BiH.

Krišto će se za poziciju hrvatskoga člana Predsjedništva BiH natjecati s Željkom Komšićem iz SDP-a i, najvjerojatnije, Martinom Ragužom koji će biti kandidat koalicije HDZ 1990 i HSPBiH.

J. GUDELJ